




Handwritten text on the spine, possibly in a Gothic script, including the words "Hundert" and "Koch".



Sammelband. Lex. 200





1942 g 8232

Eyn Sermon vō dem  
 neuen Testamēt. das  
 ist von der heyligē  
 Messe Doct.  
 Mar. L.  
 Aug.

Wittenbergk.

1520.





# Ihesus.

**E**yn sermon von dem newen Testamente/  
das ist von der heyligen Messze  
D. Mar. Lu. Au.

**Z**um erste: Das leret uns die  
erfarung aller Cronicken/dartzu die heylige  
schrifft/das yhe weniger gesetz/ yhe besser  
recht/ yhe weniger gebot/ yhe mer guter werck: vnd  
ist noch nye keyn gemeyne/ oder yhe nit lang wol re/  
girt/ wo vil gesetz gewesen sein. Darüb vor dem alten  
gesetz Mosi hetten die alten Patriarchen keyn beson  
dere weyße/ vnd gesetz got tzu dienen/dan das opffer/  
als wir vō Adam/ Abel/ Noe/ vñ der gleichen lesen/  
darnach wart Abraham/ vnd den seinen auffgelegt  
die beschneydung bis auff Mosen. durch welche got  
dem volck Israel mancherley gesetz/ weyß vnd vbun  
gen gab/ nur darumb/ das menschlich natur solt erken  
nen/ wole gar nichts hülf vil gesetz/ frum leut tzu  
machē. Dan ob wol das gesetz treybt vnd tzuwinget/  
tzu guten wercken von den bösen/ ist doch nit mug  
lich/ das der mensch das selb willig vnd gerne thu/  
sonder befindet sich alle tzeit vngunstig dem gesetz/  
vnd wolt lieber frey sein. Die weil den vnwil da ist/  
so ist nymmer keyn gut werck da: dan was nit willig  
geschicht/ ist nit gut/ vnd gleyffet nur als were es gut.  
darüb mugē alle gesetz nymāt gruntlich frum machē  
on die gnad gottes/ sonder es müssen eytel gleyßner/  
heuchler/ eusserliche/ hoffertige heyligen darauf wer  
den/ die hye yren lon entpfangen/ vnd got nymmer ge  
fallen. Also saget er tzu den Juden Malach. i. Ich  
hab keynen gefallen an euch/ dan wer ist vntter euch/  
der mir eyn thur tzuschliesse/ willicklich vnd auß lieb  
zum andern/ Ist die frucht viler gesetz auch

a ij

I.

stat y dixit.

T

Et.

3.

*Finis legum in V. T.  
redit ad tunc ubi dicitur  
2. leges in V. T. fuerunt  
ritualis et iudicialis  
Nemo vult esse  
iustus sub lege  
voluntarie*

2.

Thesir.

*Leges sine gra non  
sunt hinc saluati  
hoc sicut: I quia non  
tunc fuerit et si sit fit  
Machado et septa hor  
tempus. quia quo plures  
leges eo plures sunt leges  
over legum 3. Vbi  
Leges 2 multum se  
che.*



Multe secte originem hinc ex  
Legibus vana

## Ihesus.

Die / das vil Secten vnnnd tzurteylüg der gemeinē dar/  
auf werden. da nympt einer die weyße / ein ander eyn  
ander weyße an sich / vnd erwechst yglichē eyn heym/  
liche falsche liebe tzu seiner Secten / vnd eyn haß / ad  
yhe ein vorachtüg vnd vnachtsamkēyt der and secten /  
damit dā die bruderliche / frey gemeyne lieb vntterget /  
vnd die eygen nutzige lieb vberhāt nympt. also spricht  
Hiere. vnd Oseas / Ja alle prophetē schreyen / wie sich  
das volck vō Israel teylet in souil secten / als vil steet  
ym lant warē / ein yglich wolt etwas bessers fur der  
andern thun / daher kamen auch die Saducei vñ Pha  
risei im Euāgelio. Also sehen wir auch heut tzu tage /  
dz durch geistliche geset3 in der Lhristēheyt nur wens/  
ger recht vñ frumigkēyt erstandē ist / die welt vol gleis/  
ner vnd heuchler gemacht. vnd so mancherley secten /  
orden / vnd tzu erteilüg des einigē volcks Lhristi / das  
fast ein yglich stat in tzeihen teyl / vnd noch mer geteilet  
ist / vnd ersindē sich noch teglich newe weyße vñ wege  
(als sie meinē) got tzu dienē / blß dahyn kumen ist / dz  
pfaffen / monich / leyen vntter einand feinder worden  
sein / dan Turckē vñ Lhristē / ia die pfaffen vntter ein  
and / monich vntter einand todt feindt sein / streyten  
vmb yre auffgesetzte weyße vnd wege / als sie voll vnd  
toricht weren / nit allein zu der byndernus / sond auch  
tzu der vorstorüg Lhristlicher lieb vnd eynigkēit häget  
ein yglicher an seiner secten mit vorachtüg der andern  
dan die leyen achten sie sam nicht Lhristen werē / der  
iamer kumpt als auf den gesetzen.

Q Lzu dritē / Auff das nun Lhristus ym bereydet ein  
angenem liebes volck / dz eintrechtiglich in ein ander  
gepundē were / durch die liebe hat er auffgehabe das  
gutz geset3 Mose / vnd dz er nit vsach den sectē vnd tzu  
erteilungē hinfurter gebe / hat er widerüb nit mer dan

Das ist die logie  
nicht ist frey



# Ihesus.

ein weyß ad gesetz eingesetzt seinē gantzē volck / das ist die heilige mesz. Dan wiewol die tauff auch ein eusserliche weyß ist / so geschicht sie doch nur ein mal / vñ ist nit ein vbüß des gantzē lebens / wie die mesz. Dz nun hinfurter kein ander eusserliche weyß solt sein / got tzu dienē dā die mesz / vñ wo die geubt wirt / da ist d̄ recht gots dienst / ob schō kein ande weif mit singē / orgeln / klingē / kleidē / tzierdē / geperdē da ist / dā alles was des ist / ist ein tzusatz vō mēschē erdacht. Dan do Christ<sup>9</sup> selb stünd am erste dyß sacramēt einsetzt / vñ dy erste mesz hielt vñ vber / da war kei plattē / kein casel / kein singē / kein präge / sond̄ allein dāck sagüg gottes / vñ des sacramēts prauch. Der selbē einfeltigkēit nach hieltē die Apostel vñ alle Christē mesz ein lang tzeit. Bis dz sich erhubē die mächerley weyße vñ tzusetzen / das anders die Romische / anders die Kriechē mesz hieltē / vñ nun entlich dahin künē dz / dz haubtstück an d̄ mesz vnbesant wordē ist / vñ nit mer dā die tzusetzen d̄ mēschē in d̄

**G** zu vierdē / Ihe mer nun vnzere (andacht sein. mesz d̄ erste mesz Christi sein / vber besser sie on tzuweiffel sein / vñ ye weiter danō / ye ferlicher. Derhalbē mugē wir nit rumē vns wid̄ die Reussen ad̄ Kriechē / dz wir allein recht meßhaltē als wenig als ein priester / d̄ eyn rote casel anhat / gegē dē der ein weisse ad̄ schwartz anhat. Dann was solcher eusserlicher zusatz vñ vnterscheid ist / mag wol secten vñ vneinigkēyt durch solch vngleycheit machen / die messen mag es nymmer besser machen. Wiewol aber ich nicht wil noch vormag solch tzusetzen alle abthun ad̄ vorwerffen / doch die weil solch prechtige weyße ferlich sein / ist es nodt das wir vns nit lassen furē vō d̄ einfeltigē einsetzūg Christi / vñ rechtē prauch der messen. Vñnd ist furwar die groste nutzliche kunst tzu wissen / welchs grütlich vñ eigetlich zu d̄ mesz gehoret / vñ welchs zusetzlg vñ frēbt

Diff: Baptm et  
capna d̄vira.

v.

Quo Apl et coy  
res in upa by d̄vira  
se p̄servat et q̄m  
nias observaverint

Fueser 4 Regula

v.



## Ihesus.

ist. Dan wo der vorstendig vntterscheydt nit ist / sein die augen / vñ dz hertz mit solchem gleissen leichlich in eyn falschen sinn vnd wahn vorfuret / das man das meß achtet / das menschen ertichtet haben / vñ nymmer erferet was meß sey / schweyg dan frucht dauon entpfehet : wie es leyder tzu vnsern tzeiten geet / do ich besorg alle tag mer dan tausent meß gehalten werden / da doch vñ vielleicht nit eine meß ist. O lieben Christe vil messen habē ist nit meß habē / es gehoret mer dartzu.

**G** Zum funfften / Wollen wir recht meß halten vnd vorstan / so müssen wir alles farē lassen / was die augen vnd alle sinn in dykem handel mugē tzeigē / vnd antragen / es sey Fleyd / Klang / gesang / tzierd / gebet / tragen / heben / legen / ader was da geschehen mag in der meß / bis das wir tzuuor die wort Christi fassen / vnd wol bedencken / damit er die meß vorbracht / vnd eyngesetzt / vnd vns tzuuorbringen befolhen hat . dan darinnē ligt die meß gantz mit all yrem wesen / werck / nutz vnd frucht / on welche nichts vō der meß entpfangen wirt. Das sein aber die wort. Nemet hyn:

und esset : das ist mein leychnam der fur euch gebē wirt. Nemet hyn vñ trinckt darauß allesampt : das ist der kelch des newen vnd ewigē Testaments: in meinem blut : das fur euch vñd fur vile vorgolzen wirt: tzu vorgebung der sund.

# Ihesus.

**D**iese wort muß eyn yglicher Christen in der meß vor augen haben / vnd fest daran hangen / als an dem haubtstück der meß / in welchen auch die recht grund gute bereytung tzu der meß / vnd dem sacrament geleyret wirt: das wollen wir sehen.

**Z**um sechsten / Wen der mensch sol mit got tzu werck kumen / vnd von ym etwas entpfahen / so muß es also tzugeen / das nit der mensch anheb / vnd den ersten stein lege / sonder got allein on alles ersuche vñ begeren des menschen muß tzuorkumen / vnd ym ein tzusagung thun. das selb wort gottes / ist das erst der grūd / der felf / darauff sich hernach alle werck / wort / gedancken des menschen bawen / welchs wort der mensch muß danckbarlich auffnehmen / vnd der gotlichen tzusagung treulich glauben / vnd yhe nit daran t zweyffeln / es sey vnd geschehe also / wie er tzusagt. Diese trew vnd glaub ist der anfang / mittel / vnd endt aller werck / vñ gerechtigkeit. dan die weil er got die ere thut / das er yn furwarhafftighelt vnd bekennet / macht er ym einen gnedigen got / der yn widerüberet / vnd warhafftighelt vnd helt. Also das nit muglich ist das eyn mensch auß seiner vornunfft vnd vornugen solt mit wercken hynauff gen hymel steygen / vnd got tzuorkomen / yn bewegen tzu der gnad / sond got muß tzuorkomen alle werck vnd gedancke / vnd eyn klar aufgedruckt tzusagen thun mit worten / welch den der mensch mit eynem rechten / festen glauben ergreiff vnd behalte / so folgt dan der heylig geyst der yn geben wirt / vmb des selben glaubens willen.

**Z**um sibenden / Also wart Adam nach seinem fall eyn tzusagung than / da got tzu d schlangē sprach / Ich wil tzwischen dir vnd dem weyb eyn feintschaft setzen / tzwischen yrem samen / vnd deinem samen / sie

*Homini ad salutem suam  
Verbum dei e  
fundamentu  
lapidis angula  
rui qd est op  
aditus nisi per bera opij  
Hoc v. p. p. to lupis q  
ut us post riuu u frax  
ad huc uere (ph. 1. 20  
n. 100) sed opem ut  
se auidet ut sapienter  
tenis adhibere uergr  
+ angelos ut p. (o. da)  
ut p. uigilantia*

*significatio hanc p. ton  
glaub fiat*

*expto uer illi p. rat*



nota bene

# Ihesus.

sol dir dein haubt tzu treten / vnd du wilt lauren auff  
 yre fuß. In welche wortē wywol tūckel got vorspricht  
 hilff der mēschliche natur / dz durch ein weyb der teuf.  
 fel solt wid vberwundē werde. Dyße tzusage gottes  
 hat Adam vnd Eua / vnd alle yre kindt erhalten / byß  
 auff Noe daran sie glaubt / vnd durch dē selbē glaubē  
 selig wordē sein / sunst werē sie vortzweiffelt. Also vor-  
 sprach er sich darnach mit Noe vñ seine kindern nach  
 d̄ syndflus / bis auff Abraham Gen. xij. Den er auß  
 seinē vaterlant fordert / vnd sagt ym tzu / dz in seinē sa-  
 men solten alle Heyden gebenedeyet werde. welcher  
 tzusagūg Abrahā glaubt vnd folget / ist damit recht-  
 fertig / vnd gottes freund wordē / vnd die selbe tzusag-  
 ung Abrahe wirt in dē selben buch groß vnd vil mal  
 antzogē / gemeret vnd vorkleret / bisz das ym Isaac zu  
 gesagt wirt / der do solt d̄ same sein / vō welche Christus  
 vnd alle gebenedeyūg keme. In dysem glauben d̄  
 tzusagūg sein Abrahās kindt erhaltē bis auff Christus  
 wiewol sie in des durch David vnd vil pphetē ymer  
 basz vnd basz vornemet vnd vorkleret ist. Darūb nēnet  
 auch d̄ herr die selbē tzusagūg im Euāgelio Abrahās  
 schoß / dz darinnē alle behaltē wordē / die mit rechtem  
 glaubē daran hiengē / vnd mit Abrahā auff Christus  
 warttetē. Darnach ist Moses künē / der die selb tzusagūg  
 mit vilen figurē des gesetzes bezeichnet hat / durch  
 welche got dē volck vō Israel tzusagt dz gelobt landt /  
 da sy noch in Egyptē warē / welcher tzusagūg sy glaub-  
 ten / damit sie erhaltē sein / vnd in dz selb lant gefuret.  
 Zum achten / Also auch im newen testament  
 hat Christus eyn tzusagen ader gelubdt than / an  
 welche wir glauben sollen / vnd dardurch frum vnd  
 selig werden: das sein die vorsagte wort / da Christus  
 sagt / dz ist der kelch des newen testaments / die wollē

*Handwritten flourish*

*cuys Abrahams socht  
fis. NB.*

*Et in de pui sumps v. t.  
p. m. s. n. t.  
x. b. u. n. p. u. i. s. i. p. n. i. s.  
in No. 7. 4*

*Handwritten flourish*

*Handwritten flourish*



*quoniam in die agni  
paschali*

# Ihesus.

vorgenecklich thier / das do in dē alten testament starb  
vmb das landt Canaan / also war auch dz testament  
vnd das selb gut ad lant Canaan darinnē bescheydē  
vnd tzu gesagt tzeitlich vnd vorgēcklich. Aber Christus  
das rechte osterlāb / ist ein ewige gotliche person / die  
do stirbt / dz newe testament tzu bestetigen / darūb ist  
das testamēt vnd gut darinnen bescheyden ewig vnd  
vnuorgenecklich / vñ das meynet er / do er ditz testamēt  
gegen yhenes setzt / vnd spricht. Ein newes / dz yhenis  
alt werd vnd absey. Ein ewiges / nit ein tzeitlichs wie  
yhenis / nit von tzeitlichem landt ader gut / sonder von  
ewigen guttern tzu bescheyden / In meinem blut / nit  
in eins lambs blut / auff das also das alte gantz auff  
gehoben / dem newen allein rawm lasse.

Zu tzebedē / Was ist den nun ditz testament / ader  
was wirt vns darinnen bescheiden vō Christo? fur  
war ein grosser ewiger / vnaussprechlicher schatz / nem  
lich vorgebūg aller sūd / wie die wort klar lauttē / Ditz  
ist der kelch eyns newen ewigen testaments in meinē  
blut / das fur euch / vnd fur vile vorgossen wirt / tzu vor  
gebūg der sūd. als solt er sagen / Sihe da mēsch / ich  
sag dir tzu / vnd bescheyde dir mit disen worten vorge  
būg aller deiner sūd / vnd das ewig leben / vnd dz du  
gewis seyst / vnd wissest das solch gelubd dir vnwider  
ruslich bleyb / so wil ich darauff sterbē / vnd mein leib  
vnd blut dafur geben / vnd beydes dir tzum tzeichen  
vnd sigel bynd mir lassen / da bey du mein gedenccken  
solt: wie er sagt / so oft yr dz thut / so gedēckt an mich.  
Dan tzu gleich als ein mensch der etwas bescheydet  
daneben mit einbindet / was man ym nach thun sol /  
wie yrtz der prauch ist in den begēcknissen / vñ seel mes  
sen. also hat auch Christus ym ein begēcknis in disem  
testament gemacht / nit das er sein bedurffe / sond das

NB

*Handwritten flourish*

To

Bona. in her T.  
nobis legata.

*Sic est calix noui  
y ceteri testamenti  
paraphrasis kurz*

NB

Obum mandati

*Handwritten notes*  
pulsca phtudo  
wie einb dazum 808  
vñ dān yfeler pff

# Ihesus.

es vns nodt vnd nutz ist / so wir sein gedēckē / dadurch  
 wir im glaubē gesterckē / in d' hoffnūg befestigt / vñ in d'  
 lieb erhitzt werde. dan die weil wir auff erdē lebē / ist  
 nit anders vnser wesen gethan / dā d'z d' bose geyst mit  
 aller welt vns mit lieb vñ leid sturmet / dy lieb Christi  
 aufzuleschē / dē glaubē zutilgē / die hoffnūg zu schwe-  
 chen / darūb wir dykes sacramēts ser nodturstig sein /  
 darā wir vns wid' erhol' muge / wo wir etwas abne-  
 men / vñ teglich vben zu merūg vñ besserūg des geists.

13  
20

Zu eylfften / Weiter hat got in allen seinen zusas-  
 gen gemeynlich neben dem wort auch eyn tzeichen  
 geben zu merer sicherūg oder sterck vnser glaubens.  
 Also gab er Noe zum tzeichen den regen bogē. Abra-  
 he gab er die beschneydung zum tzeichen. Bedeon  
 gab er den regen auff das land vnd lampfel / vnd so  
 fort an findt man vil der selben tzeichē in der schrifft /  
 neben den zusagen geben. Dann also thut man auch  
 in weltlichen testamēten / d'z nit allein die wort schrifft-  
 lich vorfast / sonder auch sigel ader Notarien tzeichen  
 daran gehengt werden / d'z es yhe bestendig vnd glau-  
 würdig sey. Also hat auch Christus in dysen testamēt  
 than / vnd eyn krefftigs alleredelst sigil vñ d' tzeichen /  
 an vnd in die wort gehengt. das ist sein eygen warhaf-  
 tig fleisch vnd blut vntter dem brot vnd wein. Dann  
 wir arme menschen weil wir in den funff sinnen lebē /  
 müssen yhe zum wenigsten eyn eusserlich tzeichen ha-  
 ben neben den wortten / daran wir vns haltē / vnd zu-  
 samē kumen muge / doch also das / das selb tzeichen  
 eyn sacrament sey. das ist / das es eusserlich sey / vñ d'  
 doch geistlich ding hab vnd bedeut / damit wir durch  
 das eusserlich in das geistlich getzogen werden / das  
 eusserlich mit den augen des leibs / das geistlich inner-  
 liche mit den augen des hertzen begreiffen.

ffund

ns.

II.  
Ich in jhrer gnu-  
de des gte verbes de  
rechten gnu-  
de

5.  
sigilla.

monis fur nro h  
Anthon  
sigillum N. T.

Hier ist die dreyer (or. juu-  
nifalt.

ns.

B 4





*Kind missa est sine p[er]...*

# Ihesus.

vñ gedechtnis hynd ym lasse/dz man sein nit vorgesse.  
 Zum dreytzehenden/ Auf dysem allen ist nun  
 leichtlich tzu merckē/was eyn messz sey/wie man sich  
 dartzu bereyten sol/wie man sie haltē/vñ yr brauchē  
 sol/vnd wievil misprauch hyrinnen geschehē. Dā ebē  
 wie sich ymant stellen wolt/so ym tzechen tausent gul  
 den von eynem guten freunt bescheyden wurden/so  
 vnd vil mer sollen wir vns gegē der meßhaltē/welch  
 nit anders/dan eyn allerreichst ewiges gutes testam  
 ent ist von Christo selb vns bescheyden/vnd also  
 bescheyden/das er keyn andere vsach hat tzu sterben  
 gehabt/dan das er eyn solch testament machē mocht  
 so heys begirig ist er gewesen/seine ewige guter auß  
 tzu schutten: als er sagt/ Ich hab mit grossen begir  
 den begert dyß osterlamb mit euch tzu essen / ehe ich  
 sterb. Daher kumpt auch/das wir so blindt vñ kalt  
 bleyben/von souil messen/dan wir wissen nit was dy  
 messe sey/was wir damit machen/ ader was wir da  
 von haben. **Die** weil es dan nit anders/dan ein tes  
 tament ist/so ist furwar die alleredelste/vnd nechste  
 bereytug tzu der messe/eyn hungerige/vnd eyn fester  
 frolicher glaube des hertze/ solch testament antzue  
 men. **Wer** wolt nit mit grossen frolichen begirden  
 hoffnung/vnd trost geen/vnd fordern tausent guldē/  
 so er wyste das sie ym an eynem ort bescheydē weren/  
 sonderlich so ym nichts auffgelegt were/dann des tes  
 tators tzu gedencē/yn lobē vnd preyken: Also mustu  
 hye vor allen dingen deines hertzen warnemen/das  
 du den wortten Christi glaubest/vnd lassst sie war  
 sein/da er tzu dir vnd allen sagt/ Das ist mein blut/  
 eyn neues testament/damit ich dir bescheyde vorge  
 bung aller sund vnd ewiges leben. Wie mochstu ym  
 grosser vnere thun/vñ die heyligē meß hoher schmehe

13.

*Missa missa alius  
est q[ua]m christi test  
amentum*

*Digna et vera p[ar]te  
no ad p[ar]te.*

*Stultu  
do*

B ij



*Quod y quare dicitur  
parat digne vult  
habet ad peccatū eucharisticū*

## **Jesus.**

dan so du darinnit glaubst ad zweiffelst / so er doch  
das also gewis hat wollen haben / das er auch selbst  
darauff gestorben ist. furwar solcher zweiffel were  
mit anders / dan leugnen / vñ lestern Christus marter /  
sterben / vnd alles gut / das er damit hat erlangt.

17  
**E**zū viertzehenden / Darüb hab ich gesagt / es ligt  
alles an den Worten dykes sacraments / die Christus  
sagt / die man furwar solt mit golt / vnd eytel edel ge-  
stein fassen / vñ nichts fleyssiger vor den augen des  
hertzen haben / dan glauben daran tzu vben. **U** ab eyn  
andern beten / fasten / beichten / sich tzu der messz vñ  
sacrament bereyten / wie er wil. **T**hu du des selbigen  
gleichen / so ferne das du wissest / das alles das lauter  
narnwerg / vñ triegerery ist / so du nit die wort des tes-  
taments vor dich nimpst / vñ den glauben vñ begir-  
de datzu erweckst: du mustest läge die schuch wische /  
feder ablesen / vñ dich herauf putzen / das du eyn tes-  
tament erlangest / wo du nit brieff vñ sigel fur dich  
hast / damit du beweysen mugest dein recht tzu testa-  
ment. Hastu aber brieff vñ sigel / vñ glaubst / bege-  
rest / vñ suchest es / so muß dir's werde / ab du schon  
gründicht / gnetzlicht / stinckent / vñ auff's vnreynest  
worest. Also wiltu das sacrament / vñ das testament  
würdig entpfahen / sich tzu das du dyke lebēdige wort  
Christi fur bringest / darauff dich bawest mit starckē  
glauben / vñ begerest / was dir Christus darinnē tzu  
gesagt hat / so wirt dir's / so bistu sein würdig / vñ bist  
wol bereyt. Der selb glaub vñ tzuvorsicht muß vñ  
wirt dich frolich machē / vñ eyne freye lieb tzu Chri-  
sto erwecken / durch welch du dan eyn recht gut leben  
anfahest mit lust tzu furen / vñ sund auß hertzen tzu  
meyden. dan wer Christū liebt / wirt wol thun / was  
ym gefellet / vñ lassen was ym nit gefellet: wer wil

*17.*

# Thesus.

yn aber liebhaben/er schmeck dan den reichthub dises  
testaments Christi den armen sundern vmbsonst auß  
lautter gnaden bescheyden? den schmack bringt der  
glaub der dem testament vnd zusagen glaubt vnd  
trawet. Wen Abraham nit het glaubt der zusagung  
gottes/were nymer nichts auß ym worden. also ges  
wis nun als Abraham/Noe/David/yre zusage has  
be auffgenöme vnd glaubt/so gewis müssen wir auch  
dis testament vnd zusagen auffnehmen vnd glauben.

*Tristitia*  
*Stultitia*  
Zu funfftzehenden/So dich nun wurd anfech  
tung (wie es dan nit nachlesset) der tzuwey stuck eyns/  
das erst/das du tzu gar vnwürdig seyest solchs reichs  
testament. Zum andern/ob du gleich würdig werest/  
sey doch das gut so groß/das die natur sich entsetzt  
fur der grosse der guter. Dann vorgebung aller sund/  
vnd ewiges leben/was bringt es nit mit sich? So mu  
stu/wie ich gesagt hab/die wort Christi mer ansehē/  
dan solche gedanken/er wirt dir nicht liegen/dein ge  
danken werden dich triegen. Gleich als wen eyn ar  
mer betler/ia auch eynem busen wurden tausent gul  
den bescheyden/so wurd er nit sie fordern/auß seinem  
vordienst ader würdigkeit/auch nicht nachlassen vmb  
der grosse willen des gutes.vund so ymadt ym wurd  
furwerffen sein vnwürdigkeit/vnd grosse des gutes/  
wurd er furwar sich der keynes lassen abschrecken/  
vund sagen/was geet dichs an? ich weyß selbs wol  
das ich vnwürdig bin des Testaments/ich for  
dere es nicht auß meyn vordienst/als wehre mann  
mirs schuldig gewesen/sonder auß die gunst vund  
gnade des testatoris:hat es yhn nicht tzuuß ges  
daucht mir tzu bescheyden/warumb solt ich mich so  
vorachten/vnd das selb nit fordern vnd nemen? Also  
muß auch hie ein blod Kleinmutig gewissen wid seine

15.

*In homo habet  
et temptatorem  
pyropico h9<sup>h</sup> 15<sup>h</sup>  
9<sup>h</sup> facie 83*

*Handwritten scribble*

23



*2<sup>o</sup> no celebratio missae*

# Ihesus.

gedancken auff das testament Christi pochen / vnd  
 trotzig sein im festen glauben / vnangesehen wie vnwir-  
 dig sie / vnd groß das gut ist / dann eben darumb ist's  
 eyn gotlich testament / das so groß gut / so vnwürdige  
 bringt / damit got wil erwecken seine liebe vber alle  
 ding. Also troestet Christus die selben fleynmutigen  
 die das gut so groß dunckt / vnd sprach. Ir fleynmuti-  
 ges heuffen solt euch nit furchten / es hat ewrem vater  
 so wol gefallen / das er euch das ewige reich gebe.

**¶** Zum sechtzehenden / Nun sich was haben sie  
 vns auß der messe gemacht. Zum erste / habē sie vns  
 dyke wort des testaments vorporgen / vnd geleret man  
 sol sie den leyen nit sagen / es seyen heymliche wort / al-  
 lein in der messe von dem priester tzu sprechen. Dat nit  
 hye der teuffel vns das haubtstück von der messe mey-  
 sterlich gestolen / vnd in eyn schweyge bracht? dan wer  
 hat yhe gehört predigen / das man in der messe sol dy-  
 ser wort des testaments warnemē / vnd darauff trotze  
 mit eynem festen glauben / das doch het solt dz fur-  
 nest sein? Also habē sie sich gefurchtet / vnd vns forch-  
 ten leren / da keyn forcht ist / ia da aller vnser trost / vnd  
 sicherheyt anligt. Was elender gewissen het man hye  
 mit trosten vnd erredten kundt / die fur forcht vnd be-  
 trubtnis vorterbet sein? welcher teuffel hat yn doch ge-  
 sagt / das die wort / welche die allergemeynsten / aller  
 offentligsten sein sollen / bey allen Christen / priester  
 vnd leyen / man vnd weyben / iung vnd alt / sollen aller  
 heymlichst vorporgen sein? Wie solt es muglich sein /  
 das wir wisten was messz were / wie sie tzu vben / vnd  
 halten sey / wen wir die wort nit solten wissen / darin  
 nen die messze steet / vnd geet? Aber wolt got das wir  
 deutzschē messz tzu deutzsch lesen / vnd die heimlichste  
 wort anffs allerhohest sunge. Warumb solten wir

*Luce xij. Nolite  
 timere homines  
 nec solent tui  
 nisi in carne  
 sunt. 16.  
 Hahuy de vero usu  
 dy terrak dshim: Nere  
 scy de abela hy garth*

## I.

*Gahr bey d'brad  
 und vnn yumi fuz  
 ofu di vory chi*

*Verba q' p'raconis  
 no dnt est obsauo*

*Handwritten flourish*

*Handwritten mark*

*Handwritten mark*

*Handwritten mark*

# Thelus.

deutschen nit messz lesen auff vnser sprach/so die lati-  
nischen/Kriechen/vnnd vil andere/auff yre sprach  
mes halten? Warumb helt man nicht auch heymlich  
die wort der tauffe/ Jch tauffe dich in dem name des  
vaters vnd sons vnd heyligen geystes/ Amen? Wag  
hye eyn yder deutzsch vnd laut reden/das doch nicht  
weniger heylig wort vnd tzusagung gottes sein/war-  
umb solt man nit auch laut vnnd deutzsch yderman  
dyse wort der messen reden vnd horen lassen?

zum sibentzehenden/ So last vnns nun lernen  
das in eynem yglichen gelubd gottes sein tzuwey ding  
der man muß warnemen/das sein wort vnd tzeichen.  
Als in der tauff sein die wort des teuffers/vnnd das  
tauchen ins wasser. In der messz sein die wort/vnnd  
brot vnnd wein. Die wort sein gotlich gelubd/tzusag-  
ung/vnd testament/die tzeichen sein sacrament/das  
ist heylige tzeichen. Nun als vil mer ligt an dem testa-  
ment/dan an dem sacrament/also ligt vil mer an den  
wortten/dan an den tzeichen. dan die tzeichen mugen  
wol nit sein/das dennoch der mensch die wort habe/  
vnnd also on sacrament/doch nit on testament selig  
werde. Dan ich kan das sacraments in der messz teg-  
lich nyessen/wen ich nur das testament/das ist/die  
wort vnd gelubd Christi/fur mich bilde/vnd meinē  
glauben darinnen weyde vnd stercke. Also sehen wir  
das/das beste vnd groste stueck aller sacrament/vnnd  
der messz sein die wort vnd gelubd gottes. on welche  
die sacrament todt/vnnd nichts sein/ gleych wie eyn  
leyb on seele/eyn faßz on wein/eyn dasch on gelt/eyn  
figur on vneifullüg/ein buchstab on geist/ein scheide  
on messer/vnnd der gleichen/das war ist/wo wir die  
messz hädeln/hore/ad sehe on die wort ader testamet  
nur alleyn auff das sacramet vnd tzeichen warten/so

verba  
signa

183

In vaticano  
pro notario

NB. 18 p/a altio.

Testament  
pa p/h p/B pa  
sacramentum  
NB.

Al/mineu inter t.  
Et dicitur ut tū.

NB.

L



## Ihesus.

wirt die meß nimmer die helfft gehalten. dann sacrament on testament ist das futter on das kley nod behalten / gar mit vngleicher helfft vnd teylung.

8  
Zum achtzehenden / Daher ich fürcht das ytz in der Christenheyt mer abgotterey durch die messen geschehen / dann yhe geschehen ist vntter den Juden. dan wir horen nyrgent das die messz auff den glaubē tzu weyden vnd stercken gericht werde / dazzu sie doch alleyn von Christo geordnet ist / vnd nur als eyn sacrament on testament gehandelt wirt. Es haben vil geschriben von den fruchten der messe / vnd die selben fürwar hoch erhabē / die laß ich bleybē in yren wurdē. Aber sihe tzu das du das alles gegen dyfem achtest / wie den leyb gegen der seele. got hat vnserm glauben hye eyn weyde / disch / vnd maltzeit bereyt / der glaub weydet sich aber nicht / dan alleyn von dem wort gotes / darumb mustu der wort vor allen dingen warnemen / die selben hochheben / vil darauff geben / vnd fest daranhalten / so hastu nit alleyn die kleynen tropff fruchtlin der meß / sonder auch den heubtborn des glaubens / auf welchem quillet vnd fleusset alles gut. Wie der herr sagt Johan. iij. Wer in mich glaubt / von seinem leybe sollen fließen flusse des lebendigen wassers. Item / wer do trinckt von dem wasser dz ich gebe / den wirt nimmer mer dursten / vnd es wirt yn ym werden eyn brun eyne springende wassers ynß ewige leben. Also sehen wir den ersten mißbrauch der meß / das wir verloren haben das haubtgut / das testament vnd glauben. was nun darauff weytter ist gefolget / wollen wir auch sehen.

19  
Zum neuntzehenden / Das muß von nodten folgen / wo der glaub / vnd das wort / oder tzu sagüg gotes fallen / oder noch bleiben / das do aufstehen an yre

putandut opus operatione conduntur  
ad Remissionem peccatorum.

180  
**Ihesus.**

stat werck vnd falsch vormessenheyt auff die selben.  
**O** Da wo nit zusagug gottes ist / da ist keyn glaub: wo  
nit glaub ist / da vormisset sich yderman mit wercken  
tzu bessern / vnd got gefellig machen / vnd wo das selb  
fursich geet / so wechst darauff eyn falsch sichere vor-  
messenheyt / als sey der mensch mit got vmb seiner  
werck willen woldaran / wo es nit fursich geet / da hat  
das gewissen kein ruge / vnd weyß nit wie es thun sol /  
das es got gefellig werde. **A**lso hab ich sorg das vil  
menschen auß der mess eyn gut werck gemacht haben /  
damit sie vormeynent eyn grossen dienst thun dem al-  
mechtigē got. Nun meyn ich / so wir die vorigen dingē  
recht vorstanden haben / das die mess nit anders sey /  
dan eyn testament vnd sacrament / darinnen sich got  
vorspricht gegē vns / vñ gibt gnad vñ barmhertzigkeit.  
So wirt sichs nit fugen das wir eyn gut werck / oder  
vordienst solten darauff machen. dann eyn testament  
ist nicht / Beneficium acceptum / sed datum: es  
nympt nicht wolthat von vns / sonder bringet vns  
wolthat / **W**er hat yhe gehort / das der eyn gut werck  
thue / der eyn testament entpfehet: Er nympt wol  
tzu sich eyn wolthat. Also auch in der mess ge-  
ben wir Christo nichts / sonder nehmen nur vom  
ym. man wolt dann das eyn gut werck heysen /  
das eyn mensch still helt / vnd leset yhm wolthun  
essen vnd trincken geben / fleyden / vnd heylen /  
helffen / vnd loszen: gleych als in der tauff / da  
auch gotlich testament vnd sacrament ist / nymant  
got etwas gibt / oder wol that / sonder nympt et-  
was. So auch in allen andern sacramenten / auch  
im der predyge. dann so eyn sacrament nicht sein  
mag eyn dienstlich gut werck / so mag auch keyn  
anders eyn werck seyn / die weyl sie alle eyner art sein /

# Ihesus.

vnd natur des sacraments ader testaments ist / das es nit ein werck sey / sond ein vbüg des glaubes allein.

20  
occurrit obiectioui

6) Zum tzentzigstē / Das ist wol war / wen wir zusammen kumen in der mess / das testament vnd sacrament tzu entpfahen / vnd den glauben weyden vnd stercken / das wir das selb eyntrechtig beten / das selb gebet vmb den glauben tzu erwerben / auß dem selbē glauben oder geschehen / ist eyn gut werck / vnd die almosen aufteylen den armen: wie vortzeiten geschach da die Christen tzusamen trugen essen / vnd allerley notdurfft / dz nach der messe wart aufteylet den durfftigen. wie auß sant Pauls. i. Cor. xi. wir lernē. Aber dyß werck vnd gebet sein vil eyn ander dingk / dan dz testament vnd sacrament / welchs nymandt opffern oder geben kan / wider got noch den menschen / sond eyn yglicher sein so vil nympt vnd entpfehet fur sich allein / so vil er glaubt vnd trawet / gleich als ich fur nymandt auch nymandt tzu gut mag das sacrament der tauiff / der puß / der olung entpfahen oder geben / sond ich nym fur mich alleyn die wolthat darinnē vō got / vnd ist hye nit officium / sed beneficium: kein werck od dienst / sonder alleyn genieß vnd gewinst. Also mag auch nymannt fur den andern mess halten oder horen / sonder eyn yglicher fur sich selbst allein. dann es ist da lautter genieß / vnd nehmen / das vorsteet man alles leichtlich / so man nur der messz warnympt / was sie doch ist / nemlich das sie ist eyn testament vnd sacrament / das ist gottes wort oder tzusagung / vnd eyn heiliges tzeichen des brotes vnd weins / darunder Ihesus fleisch vnd blut warhafftig ist. Dann welch vorzunfft mag leiden / dz der solt heysen eyn gut werck vor eynem andern thun / der doher kumpt / gleych den andern / als eyn durfftiger / vnd holet fur sich selb die

18.

18.

officiu  
beneficium  
geniße

Missa nihil aliud est nisi testamentu patris nichil hoc est in dei aut in nuptio y pro panchini p anst et xim

18.  
Nemo  
pe pata  
celebrat  
aut  
pan  
et  
ic



Oblatio in missa vnde  
originem hat

# Ihesus.

wort / vnd das tzeichen gottes / darinnen got ym grad  
vnd hi. ff. verspricht / vnd gibt: Gottes wort vñ tzeichē  
vnd gnade entpfahen / ist yhe nit etwas gutes von sich  
geben oder wircken / sonder allein tzu sich nemen.

**¶** Lzū. xxi. Derhalben die weil nun fast alle welt  
auf der messe hat eyn opffer gemacht / das sie got opf  
fern / welchs on t zweyffel der dritte vnd fast der ergest  
mißbrauch ist / so müssen wir hye weylich vntterscheit  
haben / was wir hye opffern / oder nit opffern. Es ist  
on allē t zweyffel dz wort / opffern / in der messz daher  
kūmē vnd bißher / blibē / das tzu den tzeyten der Apo  
stolen / da noch etlich ybung des altē testaments gāg  
hafftig waren / die Lhristen tzusamen trugen essen /  
gelt / vnd nodturfft / welchs neben der messz wart auf  
geteylet den durfftigen / wie i. h. gesagt habe: als wir  
noch lesen Act. iij. Das die Lhristen voraufften als  
was sie hetten / vnd brachtens fur die fuessz der Apo  
stolen / die liessens dann aufteylen / vnd gebē auf dem  
gemeynen gut / eynem yglichen was er bedurfft. So  
lernēt nun der heylig Apostel sant Pauls / das man al  
les essen / vnd wes wir brauchen / sollen mit beten / vñ  
gottes wort gebenedeyen / vnd got darumb dancken.  
daher kumpt das Benedicite vñ Gracias vber tisch.  
So war der prauch des alten testaments / wen man  
got danckt vber den entpfangenen guter / das man sie  
emporzub mit den henden gegen got / wie do steet im  
gesetz Mosi. darūb haben die Apostel auch also auff  
gehaben / got gedanckt / vnd speyß / vnd was die Lhri  
sten tzusammen trugen / mit dem gottes wort gebene  
deyēt. **¶** Auch Ihesus selbst / wie sant Lucas  
schreibt / hub dē kelch auff / vñ dāckt got / trāck vñ gab  
den andern / ehe er dz sacrament vñ testamēt einsetzet.  
Lzum. xxij. Von dysem brauch sein vberbliben

Et  
Abu fur q. exau  
rab forunt sacrificiu  
origo vocabuli sancti  
ij. in curia dei

Benedicite et gratias  
agere origini dno

N3.

22

dem  
pala  
lebra  
m  
in

**Ihesus.**

Ab.  
E u hiqua missa  
mit ex vhrvns  
w/n in ura curat

noch drey wartzeichen. Das erst / dz man die erst vñ  
1. / letzt gebet der mess heysset Collecten. Das ist vorsam-  
lung / damit betzeugt wirt / das die selben gebet sein  
gesprochen als eyn Benedicite vnd Gracias vber die  
selben tzusammen getragen speys / die selben tzusegen  
2. / vnd got dancken / nach der lere sant Pauls. Das an-  
der / das die leut nach dem Euangelio noch tzum opf-  
3. / fer geen / dauo der gesang den man daselb singt / heist  
offertorium. Das ist / eyn opffer. Das dritte / das der  
priester mit der patenen auffhebt / vnd opffert got die  
vngesegete hostien / eben die selbigen zeit wen man  
singt das offertorium / vnd die leut opffern : damit an-  
getzeygt wirt / das nicht das sacrament got geopffert  
wird von vns / sonder allein die selben Collecten vnd  
opffer der vorsamleten speys / vnd gutter / das da got  
vor gedanckt wirt / vnd sie gesegnet anftzuteylen allen  
durfftigen. Dan hernach da der priester in der stilmeß  
die gesegnet hostien / vñ kelch empor hebt / sagt er kein  
wort von dem opffer / da er doch am meysten sagen  
vnd gedancken solt des opffers / wo die mess ein opffer  
were. sonder wie ich daroben gesagt / Er hebt es nit  
got / sonder vns empor / vns des testaments tzuerin-  
nern / vñ reytzen tzu dem glauben on das selb. Des  
selben gleichen / wen er das sacrament entpfehet oder  
gibt / gedanckt mit keyne wort des opffers / das doch  
muß vnd solt sein / wo das sacrament eyn opffer were.  
darumb mag vñ kan die mess nit heysen / noch sein  
eyn opffer / des sacraments halben / sonder der speys  
vnd gebet tzusammen getragen / darinnē got gedäckt /  
vnd sie gesegnet werden.

Quahung missa sancti  
cetera

23

1. Zum drey vnd tzentzigste / Nun ist abgangen  
der brauch speys vñ gelt tzusammen tragen in der  
mess / vnd nit mer / dan noch eyn wartzeichen des selb

# Ihesus.

ben bliben /eynen pffening tzu opffern am heyligen /  
 fest /vnnnd sonderlich am Ostertag /da man noch die  
 fladen /fleisch /eyer zc. tzu kirchen tregt /vnnnd weyhen  
 lesset. Dan nun an stat solcher opffer vnd Collecten /  
 stift kirchen /closter /vnd spital auffgericht sein / vnd  
 erhalten solten werden / allein dartzu das den durff-  
 tigen in eyner yglichen stat /von vnd bey den selben all-  
 yr nodturfft geben wurd /vnd also keyn bettelr /noch  
 darblosser vntter den Chriſten blibe /sond allesampt  
 vō der messe gnug hettē /an leyb vnd seele. Aber es ist  
 alles vmbkeret /gleich wie den seelē dy meß nicht recht  
 wirt vorbracht /sonder als ein opffer vorstanden / nit  
 als ein testamēt. Also widerüb was dz opffer ist /vnd  
 sein solt. dz ist /die gutter d kirchē /vnd closter: sein nym-  
 mer opffer /werden auch nit den durfftigen /da sie hyn  
 geboren /gereicht mit danck vnd gebenedeyūg gottes /  
 darüb auch got ertzurnet /vñ lesset es geschehē / dz der  
 kirchē vñ closter guter ytzt tzu krieg /weltlicher pracht /  
 vñ tzu solchē mißbrauch kñpt / dz kein and gut so schet-  
 lich vnnnd lesterlich gehandelt wirt /vnnnd vmbkumpt /  
 welchs auch recht vnd billich ist. Die weil es nit die-  
 net /dartzu es vorordnet ist /den armen /das es nit wirs-  
 dig bleib tzu dienen /dan nur tzu sund vnnnd schandt.  
 ¶ Lzū. xxiij. Fragestu den /was bleibt dannun in d  
 meß /dauō sie mag ein opffer heysen / Seyteinmal so  
 vil wort in dē ampt vō dem opffer geschehē: Antwort.  
 Ich sag /das nichts bleibt /dan stracks vnd kurtzūb /  
 wir muessen die messen lassen bleibē ein sacrament vñ  
 testament /welch nit sein /noch mugen ein opffer sein /  
 so wenig als die ander sacramēt /tauff /firmūg /pub-  
 olung zc. wir vorluren sunst dz Euangeliū / Chriſtū /  
 trost /vñ alle gnad gottes. Darüb müssen wir die meß  
 bloß vñ lautter absondern /vō dē gebetē vñ geperdē dy

13.  
 Meß meß dyo opff  
 is vñ vñ vñ vñ vñ  
 will.

Ca un noum a i  
 is vñ vñ vñ

13.

29.  
 Meß dz opff v  
 y pñ ata ab onbg  
 y collect vñ

30



# Ihesus.

23.

datzu than sein von den heyligen vettern / vnd die selben beyde / so weyt von eynander scheyden / als himel vnd erden / das die messz eygentlich nit anderst bleib / dan das testament vnd sacrament in den wortē Christi begriffen. Was mer vber die wort da ist / sollen wir achten gegenn die wort Christi / als wir die Monstrantzen / vnd Corporal achten gegen die hostien vnd sacrament selbs / welch wir nit anderst achten / dann als tzu setze / damit vnd darinnen wir das sacrament fuglich vnd erlich handeln mugē. Gleich nun wie wir die Monstrantzen / vnd Corporal / vnd altar tucher ansehen / gegen das sacrament / also sollen wir alle tzu gesetzte wort / werck vnd geperden der messz ansehen / gegen die wort Christi / darinnen er dz testament setze vñ gibt. Dan so die messz oder das sacrament ein opffer were / so muste man auch sagen das / das ein messz vnd opffer hieß / wen den tranckē das sacrament vnß hauff bracht wirt / oder w. n die gesunden das in der kirchen entpfienge / vnd souil messen vnd opffer sein / souil tzum sacramēt geen. so es dan hie nit opffer ist / wie sol es dann in des priesters handt eyn opffer sein? so es doch eynerley sacrament / eynerley brauch / eynerley nutz / vnd auff alle wege das selb sacrament vnd testament ist bey vns allen.

113.

Agustus quo refertur  
opimus corp, q. d. d. i. u. m.  
Sacrificium  
Sacrificium

25.

**¶** Lzum. xxv. Darumb sollen wir des worts opffer wol warnemen / das wir nit vormessen etwas got tzu geben in dem sacrament / so er vns darinnen alle dingē gibt. Wir sollen geystlich opffern / die weyl die leyblichen opffer abgangen / vnd in kirchen / closter / spital gutter vorwandelt sein. Was sollen wir den opffern? Vns selb / vnd alles was wir haben mit fleysßigem gepet / wie wir sagen / Dein will geschehe / auff der erdē als in hymel. Hye mit wir vns dargebē sollē

Deum sacrificium  
(ut in sacrificio dicitur  
ne  
sacrificare q. uobis  
me corpus dicitur)

# Ihesus.

gotlich willen / das er von vnd auß vns mache was er wil / nach seinem gotlichen wolgefallen / dartzu ym lob vnd danck opffern / auß gantzen hertzen für sein vnaussprechliche suesse gnade vnd barmhertzigkhey / die er vns in dysem sacrament tzu gesagt / vnd geben hat. Und wiewol solchs opffer auch aussen der messz geschicht / vnd geschehen sol / dan es nit nodtlich vnd wesentlich tzu der messz gehort / wie gesagt ist / szo ist doch kostlicher / suglicher / stercker / vnd auch angenehmer / wo es mit dem hauffen / vnd in der samlung geschicht / da eyne das ander reytzt / bewegt / vñ erhitzt / das es starck tzu got dringt / vnd damit erlanget on allen tzuweyffel was es wil. Dan so Christus hat tzu gesagt / Wo tzuwen sein vorsamlet in seinem namen / da sey er in yrem mittel / vnd wo tzuwen eyne sein auff erden / etwas tzu bitten / sol geschehen als was sie bitten. Wieuil mehr solten erlangen was sie bitten / wo eyne gantze stat tzusammē kumpt / got eynrechtiglich tzu loben vnd bitten. wir duiffen nit vil ablas brieffe / wo wir hye recht furen / es solten auch die seelen auß dem fegfewr leichtlich erlofet werden / vnd vntzulich guter folgen. Aber es geet leyder nit so tzu / es ist doch alles vorkeret. Was der messz eygen ist tzu thun / geben wir vns vnd wollens selber thun. Was wir thun solten / geben wir der messz tzu thun / das machen alles vngelerte / falsche prediger.

1. Zum. xxvi. Das ist wol war / solch gebet / lob / danck / vnd vnser selbs opffer sollen wir nit durch vns selbs furtragen vor gottes augen / sonder auff Christus legen / vnd yn lassen das selb furtragen. wie sant Pauls lernet Heb. xiiij. Lasset vns alle tzeit got opffern eyne opffer des lobes / welchs ist die frucht der lippen / die yn bekennen vnd preysen / vnd das als durch

D

*Vbi duo vel tres congregati*

*A minore ad maius*

20.

*Fundamentum orationis laudationis et gratiarum actionis e. chry.*



## Jesus.

**C**hristum/dann darumb ist er auch eyn priester. wie  
psal. cix. sagt. Du bist eyn ewiger priester / nach der  
weyße Melchisedech/das er fur vns bittet im himel/  
vns er gepet vnd opffer entpfehet/vnd durch sich selb/  
als eyn frumer pfaff vor got angenehme macht: wie  
aber mal sant Pauls sagt Heb. ix. Er ist gen hymel  
gefare / auff dz er sich eyn mitler mache vor gottes an  
gesicht/fur vns. vnd Ro. viij. Christus Jesus/der ge  
storben ist/ia auferstanden von den todten/vnd sitzt  
tzu der rechten handt gottes/der auch fur vns redet/  
vnd mittelt. Auf welchen wortten wir lernen / dz wir  
mit Christum/sonder Christus vns opffert/vn nach  
der weyße ist es leydlich/ia nutzlich/das wir die messz  
eyn opffer heysen/nit vmb yret willen/sonder dz wir  
vns mit Christo opffern. das ist/das wir vns auff  
Christum legen mit eynem festen glauben seines tes  
taaments/vnd nicht anders mit vnserm gebet/lob/  
vnd opffer vor got erscheynen/dan durch yn vnd sein  
mittel/vnd wir nicht daran tzuweyffeln/er sey vnser  
pfarrer oder pfaff im hymel vor gottes angesicht.  
Solcher glaub furwar macht/das Christus sich vns  
ser annympt/vns selb/vnser gebet/vnd lob furtregt/  
vnd sich selbs auch fur vns dargibt im hymel. **W**o  
man also die messz eyn opffer hysch/vnd vorstundt/were  
es wol recht. Nit das wir das sacrament opffern/son  
der das wir durch vnser loben/betten/vnd opffern yn  
reytzen/vrsach geben/das er sich selb fur vns im hy  
mel/vnd vns mit ym opffer. Als wen ich sprech / ich  
het eynem fursten seinen son geopffert/so ich doch nit  
mer than het/dan das ich den selben son bewegt het/  
mein nott vnd gewerb dem fursten antzutragen/vnd  
des sons tzu eynem mitler gebraucht.

**E**zu sibben vnd tzwentzigste/Aber auff die weyße

## Chriſtus.

vorſtehen faſt wenig die meſſe. dann ſie meynen allein d̄  
prieſter opffer die meſſe vor got / ſo doch dyſer brauch  
vnd weyße eyn yglicher der das ſacrament entpfahet /  
vbet oder vben ſol / ia auch alle die / die bey der meſſe  
ſein / ob ſie nit leylich das ſacrament entpfahen / vnd  
noch mer / ſolch weiß des opfers mag ein yglich Chri-  
ſten / wo er iſt / vnd alle ſtund vben. wie Paulus ſagt /  
Laſſet vns durch yn alle tzeit opffern / das opffer des  
lobes. Vnd psal. cix. Du biſt eyn ewiger prieſter. Iſt  
er eyn ewiger prieſter / ſo iſt er alle ſtund eyn prieſter /  
vnd on vntterlaß opffert vor got. Aber wir mugen nit  
alle tzeit gleich ſein / Darumb iſt die meſſe eyngesetzt  
das wir dazusammen kumen / vnd in gemeyn eyn  
ſolch opffer thun. Wer nun die meſſe anders vorſteet /  
oder yr anders braucht dan eyn testament / vnd ſolch  
opffer / d̄ ſehe tzu / was er vorſtee / Ich vorſtee ſich / wie  
geſagt iſt / Das eygentlich nit anders ſey / dan dz wir  
das testament entpfahen / vnd daneben vns ermanen  
vnd bedencken den glaubē tzu ſtercken / vnd nit tzuweif-  
ſeln das Chriſtus im himel vnſer pfarrer ſey / ſich fur  
vns on vntterlaß opffer / vns / vnſer gebet / vnd lob fur /  
trag / vnd genem mach: gleich als wen ich dem leylich-  
lichen yrdeniſchem pfarrer wolt opffern in der meſſe /  
vñ befulhe ym mein nodt / vñ gottes lob furtzutragē /  
vñ er mir des ein tzeichē geb / er wolles thun. Gleich wy  
ich hie dē pfarrer offert / also opffer ich auch Chriſtū  
dz ich begere / vñ glaub er nem mich / mein lob vnd ge  
bet auff / vñ brings fur got / durch ſich ſelbs / vnd gibt  
mir dē ſelbē glaubē tzuſicheren / ein tzeichē / er wol es  
thun: dz tzeichē iſt dz ſacramēt brotes vnd wein. So  
wirts klar / dz nit allein d̄ prieſter die meſſe opffert / ſon /  
der eynes yglichen ſolcher eygener glaub / der iſt das  
recht prieſterlich ampt / durch welchs Chriſt wirt fur

*Ca. raroni  
miffa inſtituta c*

*Diute.*

*11th minimum seen above  
y mit nicht*

### Ihesus.

got geopffert/welchs ampt der priester mit den eusser/  
lichen geperden der messz bedeutet/vnnd sein also al/  
samt gleich geystliche priester vor got.

28.

*In vcrator  
Stadt pndvoty*

**G** zu. xviii. Auf dysem magstu nun selb merckē  
das yr vil sein/die recht messz halten/vnd opffern/die  
selbs nichts darumb wissen/ia nicht achten das sie  
priester sein/oder messz halten mugen. Widerumb vil  
die sich groß muhen/vnd allen fleyß furwenden/mey/  
nendt sie halten gar wol messz vnd opffern recht.vnnd  
ist doch nichts recht. Dan alle die/so den glauben ha  
benn/das Christus fur sie eyn pfarrer sey im hymel  
vor gottes augē/vñ auff yn legen/durch yn furtragē/  
yre gebet/lob/nodtvñ sich selbs nit daran tzuweyffeln  
er thu das selb/vnd opffer sich selb fur sie/nemē dar/  
auff leiblich oder geystlich das sacramēt vñ testamēt/  
als eyn tzeichē alles des selben/vnd tzuweyffeln nit/es  
ist da alle sund vorgebē / got gnediger vatter worden/  
vnnd ewiges leben bereyt. Sibe alle die/wo sie sein/  
das sein recht pfaffen/vnnd halten warhafftig recht  
messz/erlangen auch damit/was sie wollen. dan der  
glaub muß alles thun. Er ist alleyn das recht priester/  
lich ampt/vnd lesset auch nymandt anders sein/dar/  
umb sein alle Christen man / pfaffen: alle weyber/  
pfeffyn/es sey iungk oder alt/herr oder knecht / fraw  
oder magd / gelert oder leye / Wie ist keyn vnterscheid  
es sey dann der glaub vngleich. Widerumb alle die  
solchen glauben nit haben /sonder vormessen sich die  
messz/als eyn opffer auff tzutreyben / vnnd yr ampt  
got furtragen /das sein olgotzen/halten eusserlich meß  
wissen selbs nit was sie machen/vnnd mugen got nit  
wol gefallen/dem on rechten glauben vn muglich ist  
etwas gefallē.wie sant Pauls Heb.xi. sagt. Nun ist  
yr vil/die solchen rechten glauben heymlich haben/

*Quis dicit  
Stadt pndvoty*



## Jesus.

vnd wissen selbs nichts darumb: vil die sein nit ha-  
ben vnd werden sein auch nit gewar.

**G**zum. xxix. Frage wir/was geschlecht den durch  
die messen/so fur die seelen im fegfewr gehalten wer-  
den/so doch nun eyn solch starck gewonheyt ist einge-  
rissen/seel messen tzu stiffen/vnd furwar vil bucher  
hyer vber gemacht. Antwort. Gewonheyt hyn ge-  
wonheyt her/gottes wort muB vorgehen/vnd fest  
bleyben das die mes/ nit anders dann eyn testament  
vnd sacrament gottes sey/welchs nit eyn gut werck/  
noch opffer sein mag/ob es wol in dem opffer/vnd  
guten wercken gefasset/mag entpfangen werde/wie  
gesagt ist. Darumb ist nit tzuweyffel/wer on vorge-  
sagten glauben mes helt/souil an ym ist/wid sich selb  
noch ymandt behilfft. dann das sacrament fur sich  
selb/on den glauben wirckt nichts/ia got selber/der  
doch alle dingt wirckt/wirckt vnd kan mit keynem  
menschen guts wircken/er glaub dan ym festiglich/  
wievil weniger das sacrament. Es ist leychtlich ge-  
sagt/Eyn messz ist krefftig/sie geschehe von eynē frū  
men oder boken pfaffen/sie sey angenehmer opere opera-  
ti/nicht opere operantis. Aber nit mer dartzu auff tzu  
bringen/dan das vil also sagen/vnd gewonet sein/ist  
eyn schlechte bewerung das darumb gut sey. Es has  
ben vil reychtumb vnd wollust gelobt vnd gewonet/  
sie müssen darumb nit gut sein/man solt schrifft oder  
vornunfft dartzu bringen. Darumb last vns furschē/  
das wir nit narren/ich kans nit begreiffen/dz on mis-  
brauch sein solt/souil seelmes vnd begengnis stiffen/  
sonderlich so das alles fur gute werck vnd opffer/got  
damit tzu betzalen/geschicht/so nit anders/dann ge-  
niessen vnd entpfahen hye ist der gotlichen gnadē vns  
in seinē testament vnd sacramēt tzu gesagt vnd geben.

D ih

*Alme gyltent in  
purgatorij  
für D myn*

29.

*tho.  
q. 79 abuf  
de q. in auf  
R. für die f. u.  
tu myn f. l. h.*

## Thesius.

30  
Zu dreysigsten / Da wil ich gerne mit stimmen  
das der glaub den ich genennet hab das recht priester  
liche ampt / der vns alle zu pfaffen vñ pfessyn macht /  
durch welchen wir vns / vnser nott / gebet / lob / vñnd  
dancck auff Christo / vñnd durch Christu / neben dem  
sacrament opffern / vñnd damit Christum fur got opff  
fern. das ist / im vrsach geben vñnd bewegen / dz er sich  
fur vns / vñnd vns mit ym opffert. Der selb glaub sag  
ich / vormag warlich alle ding im himel / erden / hell /  
vñnd fegfewr / vñnd mag dem selben glauben nymandt  
tzauil gebē. vñnd wie ich daroben gesagt hab / so Chri  
stus tzweien menschen vrspricht aller ding erhörung /  
wievil mer mugen bey ym erlangen was sie wollen /  
sonil menschen. Ich weyß wol das etlich werdē leicht  
fertig sein / byrime mich eynen ketzer tzuschelte. Aber  
lieber gesel du soltest auch tzusehen / ob du es so leicht  
lich bewerē küdest / so leichtlich du lesterst. Ich hab  
wol gelesen / kenne dein bucher auch wol / darauff du  
dich grundest / das du nit darffts dencken / ich wisse  
dein kunst nit: ich sag aber das dein kunst keyn grund  
hat / vñnd magest sie auch nit bewerē. wirst auch auß  
einem sacrament oder testament gottes nyimmer mer  
eyn opffer oder werck der gnugthuung mache / so auch  
die gnugthuung an yr selbs mer eyn menschlich dann  
gotlich gesetz ist. Darumb radt ich / last vns des ge  
wissen spilen / vñnd das vngewisse faren. das ist / wen  
wir den armen seelen / oder ymandt anders heiffen  
wollen / das wirs nit hynschlahen / vñnd auff die meß /  
als eyn gnugsam werck vns vorlassen / sonder zusam  
men kumen zu der meß / vñnd mit dem priesterlichen  
glauben alle anligende nott auff Christo / vñnd mit  
Christo furtragen / bittendt fur die seelen / vñnd nicht  
daran tzweiffeln / wir werden erhoret / szo mugen wir

292

## Ihesus.

gewiß sein / das die seele erloset sey. dan der glaub auff  
Christus zusagē gegrunde / treugt nit / feylt auch nit.  
**G** Zum xxxi. Also lesen wir / dz sant **Adonica** sant  
Augustinus mütter an yrem todtbet begeret / sie wol  
ten yr gedenccken bey der mess. dann wo die mess an yr  
selb gnug were yderman tzu helffen / was duiffen wir  
des glaubens vnd gebets? **N**ochtestu aber sagē / wo  
das war ist / so mocht eyn yglicher wol auff dem feld  
messhalten / oder solch opffer opffern. dan es mag eyn  
yglicher wol eyn solchen glauben auff dem feld tzu  
Christo haben / ym sein gebet / lob / nodt / vnd sach  
opffern / vnd befehlen / got im hymel furtzutragē / dar  
tzu mag er auch wol an das sacrament vnd testament  
gedenckē / des selben hertzlich begeren / vnd also geist  
lich entpfahen. Dann wer sein begeret / vnd glaubt /  
der entpfehet es geistlich / wie sant Augustinus leret.  
was ist es dan nodt das man mess hab in der kirchē?  
**A**ntwort. Es ist war / solcher glaub ist gnug / vnd  
richtet es warlich alles auf. **A**ber wo mochtestu an  
solchen glauben / opffer / sacrament vnd testament ge  
dencken / wen es nicht in etlichen benannten ortern /  
vnd kirchen leylich gehandelt wurd? **G**leich ale die  
tauff / vnd absolution / wiewol on sie der glaub gnug  
sam ist / wo man nicht mer thun kan / doch wen sie nyr  
gend weren / wer kundt daran dencken / vnd glauben /  
oder wer kund etwas dauon wissen / oder sagē: Auch  
die weyl got das selb so eyngesetzt hat / muß man das  
selbig nicht vorachten / sonder mit grossen erhen /  
lob / vnd danck annehmen. **D**ann ob schon keyn  
sach were / warumb wir leylich messhalten solten /  
vnd nicht alleyn an ynwendigen glauben vnd ges  
nugen lassen / szo were das genug / das got eynges  
etzt vnd haben wil / welchs wille vns vor allē dingen

Santa Maria

31

ti/wria.

abuho

NB.

NB

ducho

11 12

2

3

4

*Necessarium est d. christum  
quod in d. ecclesia*

## Ihesus.

3. gefallen vnd gnugsam vsach sein sol alles tzu thun / vnd tzulassen. So ist auch das voreyl da / das wir noch im fleisch lebē / vnd nit alle so vollūmen sein vns im geyst tzu regiren. Ist vns nodt das wir leyplich tzu sammen kumen / eynes das ander mit seinem exem / pel / gebet / lob vnd danck tzu solchem glauben entzun den / wie ich daroben gesagt / vnd durch leyplich sehē oder entpfahen des sacraments vnd testaments be / wegen mer vnd mer pesserer den selben glauben. Es sein vil heyligē / als sant Paulus Eremita / vil iar on mes in der wusten bliben / vnd doch nymmer on mes gewesen. Aber so hohe geystliche weyße / sein nit ein yglichen oder der gantzen gemeyn nach tzuolgen.

33

*Ubi dei vni vni  
et instituta*

*Cur missa instituta*

*Cur huiusmodi  
dicitur tractatus*

*Ubi huiusmodi  
dicitur tractatus  
paulo.*

Lzu. xxxiiij. Doch die grossst sach / leyplich mess tzu halte / ist vmb des wort gottes willen / welchs ny mandt entperen kan / vnd das selb teglich mit geubt vnd getriben sein / nit alleyn darumb / das teglich new Christen werden geporen / getaufft / auffertzogen / son der das wir im mittel der welt / fleisch vnd teuffel leb en / die nit rugen vns antzusechten / vnd in die sund tzu treyben. wider welche die sterckest were ist dz heyl ig wort gottes / das auch sant Pauls das selb nenet eyn geystlich schwert / das kreffrig ist wider alle sund. Das tzeygt an do der her die mes eynsetzt / vñ sprach / Das sollet yr thun / mein do bey tzu gedēcken. als solt er sagen / Als offte yr dyß sacrament vnd testament hā / delt / solt yr von mir predigen. Wie auch sant Pauls sagt. i. Cor. xi. So offte yr esset dyß brot / vnd trincket dyßen kelch / solt yr predigen vnd verkundigen dē todt des hern / bis das er kumpt. Vnd psal. cii. Sie werden verkundigen tzu Zion die ere gottes / vnd sein lob tzu Jerusalem / so offte tzusammen kumen die kunige (das ist die Bischoff vnd regirer) vnd das volck tzum

# Ihesus.

gottes dienst. Psal. cxi. Er hat eyngesetzt eyn gedechtnis seiner wunder / damit das er eyn speyß geben hat alle die yn furchtē. In dyßen spruchen siehestu wie die mesß eyngesetzt ist / Christum tzu predigen vnd lobben / sein leyden vnd alle seine gnade vnd wolthat tzu preysen / damit wir yn tzu lieben / hoffen / glauben bewegt / vnd also auff die selben wort oder predige auch eyn leylich tzeichen / das ist das sacrament entpfahen / auff das damit vnser glaub mit gotlichen wortten vnd tzeichen vorsorgt vnd befestigt / starck werde wider alle sund / leyden / todt / vnd helle / vnd als was wider vns ist. Vnd wo die predige nit het solt sein / het er die mesß nimmer mer eyngesetzt. Es ist ym mer an wort / dā an dem tzeichen gelegen. dan die predig sol nit anders sein / dan verklerung der wort Christi / da er sagt / vnd die mesß eynsetzt / Das ist mein leyb / dz ist mein blut ꝛc. Was ist das gantz Euangeliū anders / den eyn verklerung dyßes testaments? Christus hat das gantz Euangeliū in eyner kurtzen summa begriffen / mit den wortten dyßes testaments oder sacraments. Dan das Euangeliū ist nit anders / dan eyn verkundigung gotlicher gnaden / vnd vorgebung aller sund durch Christus leyden vns geben. Wie sant Pauls beweyset Ro. x. vnd Christus Luce vlt. das selb haben auch in sich die wort dyßes testaments / wie wir gesehen haben.

Lzum. xxxiiij. Darauf mugen wir sehen / was es fur eyn iamer vnd vorkeret wesen sey / dz souil mesßen gehalten werden / vnd doch das Euangeliū gantz geschwigen wirt. Treten auff vnd predigen den armen seelen sprech fur Korn / ia den todt fur das leben / meynen darnach sie wollens mit menige der mesß widerstatten. was were das fur eyn tauffen / wen der

nb.

und sine glo

39  
 In Act. 17. v. 18.  
 In Act. 17. v. 18.  
 In Act. 17. v. 18.



## Jhesus.

Teuffer allein begosse dz Kindt/vnnd spreche keyn wort  
dartzu: Ich besorge dz es also tzugee/das die heylige  
wort des testaments/darüb so heymlich gelesen/ge  
halten/vnnd den leyen vorporgen werde/dz got durch  
seinen zorn damit betzichne/wie dz gätz Euangeliū  
nit mer öffentlich dem volck geprediget wirt/dz gleich  
wie die summa des Euangelij vorporgen ist/dz auch  
also sein öffentlich verklerung geschwigen sey. Dar  
nach haben sie vns die eyne gestalt des weins gar ges  
nūmen/wiewol nicht vil daran gelegē ist/danes mer  
an den wortten/dan am tzeichē gelegē ist. Doch wolt  
ich gerne wissen/wer yn die gewalt geben hat solchs  
tzuthun/mit der weyße mochten sie vns auch die and  
gestalt nemen/vnnd die ledige monstrantzen fur heyl  
tumb tzu kussen geben. Zuletzt alles was Christus  
eyngesetzt het/auffheben. Ich furcht es sey eyne figur  
vñ vorbild/die nichts guttes bedeut/in dyser ferlichē  
verkerten letzten tzeit. Man spricht der Babst hats  
macht tzuthun Ich sag/es sey ertichtet/er hat sein nit  
eyn harbreyt macht/was Christus gemacht hat tzu  
wandeln/vnnd was er darinnē wandelt/dz thut er als  
eyn Tyran/vnnd widerchrist: wil horen wie sie es wol  
len bewerer. Nit dz ich darüb wolt eyne auffrur anhe  
ben/dan wir an dem wort mer macht ligt/dan an dē  
tzeichē/sond dz ich den freuel nit leydē kan/das sie nit  
allein vns vnrecht thun/sond wollen recht dartzu ha  
ben/vnnd vns dringen/solch vnrecht nit allein tzu ley  
den/sonder auch fur recht vnnd wolthat tzu preyßen.  
Sie thun was sie wollen so ferne/dz wir frey bleybē  
vnrecht nit fur recht tzu bekennen. Es ist gnug das  
wir vns mit Christo lassen an den backen schlagen/  
es ist aber nit tzuthun/das wir es loben sollē/als ha  
ben sie wol daran than/vnnd eyn gottes lon vordienet.

st abusus curue

nid In dalef  
libr.

obue die

B

78.

# Jesus.

Q Zum xxxv. Wo wollen aber die elenden pfaffen vnd leyen bleyben/die von dem vorstandt der messen vnd glauben so weyt kumen sein/dz sie gleich ein tzen berey darauff gemacht haben. Etlich lassen mehhalte dz sie reich werden/vnd yn in yrem handel gluckselig gehe. Etlich darumb/dz sie meynen wo sie des morgens meh horen/sein sie den tag sicher vor aller nodt/vnd ferligkhey. Etlich vmb yre krackheyt/etlich noch vil nerrischer/ia auch sundlicher dingk willen/finden dennoch so dolle pfaffen die gelt neme/vnd thun yre willē. Weiter habē sie nun eyne meh besser gemacht dē die ander/eyne hye tzu/die ander dartzu nutzlich geschetzt: da sein siben gulden messen erfunde/Des helige creutz meh hat eyn ander tugent vberkumen/dan vnser frawen meh. Dye schweigt yderman still/vnd lassen das volck eynher gehen/vmb des vorfluchten/schendlichen pfennings willen/der durch so macherley namen vnd tugent der meh/nit hauffen tzugehet/also muß der glaub gleych wie Christus verkaufft werden vor seinem Juda. das ist/von dem geytz vnd gelt durst. Man findet auch etlich die vnter dem altertuch lassen messz halten vber ditz vnd das. Kurtz vmb/allerley muß die messz thun/on yr rechts eigens werck/den glauben/des achtet nymandt. Die sein nun die besten auff erden/die vil messz lassen halten/gleych ob sie damit gedechten vil gutter werck tzusammen/das macht alles die vnbescheydenheyt/die do nicht abszondert/die tzusetzeug des gesanges oder gebettes/von der rechten naturlichen messz. dann eyn messz ist wie die andere/vnd ist keyn vnterscheyd/dann am glauben. Dann wer am allerneysten glaubt/dem ist die messz am allerbestē/vn tzu glaubē dienet sie allein/vn sunst tzu keine ding.

35  
 Stg abu/ur.  
 Stm abu/y

E ij



## Jhesus.

Das ist wol war / die tzu gesetzten gebet dienen wol /  
eyns hyetzu / das ander dartzu / nach laut yrer wort /  
aber die sein nit inef noch sacrament.

36.

13

120

18

16

Q / Zum. xxxvi. So were mein radt / dz wo dy messen nit werden auff solchen glauben gerichtet / dz die selben wurden abgethan / vnd die gestiffte seelmessen gemindert. furwar wir ertzurne got mer damit / dan wir vorsunen. Was sols doch sein / das in stifften vnd clostern so gestreng die priester werden vorpunden / tzu den ierliche messen / die doch nit allein on solche glauben / sonder auch auff yre weyße vil mal vngeschickt sein müssen. Christus selbs hat nyemandt wolt dartzu vorpflichten / vnd lief vns die freyheit / da er sagt / wen yr das thut / so thuts in mein gedechtnis. vnd wir menschen vorpflichten vns so hart dartzu / treybe vns hynan / wider vnser eyge gewissen. Ich sehe auch das solch stiftung vil mal keyn gutten grundt hat / sonder eyn heymlicher geitz solcher pflicht vsach ist / das wir darumb vil messen auff vns laden / auff das wir tzins tzeitlich guttes gnug haben / sprechen darnach wir thunf vmb gottes willen / aber vmb sunst vnd gottes willen soze ich solt man wenig finda / die solch last auff sich luden. Dags aber geschehen / das sie alle mit obgesagten glauben werden gehalten / des ich mich gar schwerlich vorsehe / sein sie tzu dulden. wo aber nit / so were es das allerbest / das des tages in eyner stat nur eyn mes were / vnd die selbe mit rechter weyße / bey der samlung des volcks gehalten. Wolt man yr aber yhe mer haben / das man das volck teylet in souil messen / vnd eyn yglich teyl tzu seiner mes vorordnet / da selbest seinen glauben tzu yben / sein gebet / lob / vnd nodt in Christo tzu opffern / wie darobē gesagt ist.



### Jesus.

Capitulum xxxvij. So dan nun die mess ist ein testam<sup>ent</sup> vnd sacrament / Darinnen zugesagt wirt mit eynem keychen vorpitschirt / vorgebung der sund / vnd alle gütade gottes volget es von ym selv / welch die beste bereytung dartzu sey. On tzuweyffel ist sie denen gegeben / die yr bedurffen vnd begeren. Mer bedarff aber mer vorgebung der sund / vnd gottes gnade / den eben die armen elenden gewissen / die von yren sunden getriben / vnd gemartert werden sich fürchten vor gottes tzuorn / gericht / todt / vnd helle / die so recht gerne wolten eynen gnedigen got haben / vnd keyn grossere begirde haben / das sein sie warhafftig / die tzu d mess bereyt sein. Dann bey denen finden dyse wort stadt / vnd rawm / da Christus sagt / Nemet hyn vn trincket / das ist mein blut / das für euch vorgossen wirt / tzu der vorgebung der sund: vnd wo eyn solche seel disen worten glaubt / wie sie schuldig ist / so bringt sie von d mess alle frucht der messen / das ist frid vnd freud / vn wirt also geystlich dadurch fedt vnd wol gespeysset. wo sie aber nit glaubt da hilfft keyn gebet / noch vil mess horen / es muß nur ymmer erger werden. Also sagt psal. cxij. Du hast mir vor mein augen bereyttet eynē tisch / wider alle meine anfechtung. Ist das nit eyn klarer spruch: was ist nun grosser anfechtung dan die sund / vnd boß gewissen / das gottes tzuorn alle tzeit forcht vnd nimmer ruge hat? Item psal. cxii. Er hat eyn gedechtnis gemacht seiner wunderthaten / vnd speys geben denen / die sich vor ym fürchten. So ist gewis / das den freyen / sichern geystē / die yre sund nit beisset / die mess keyn nutz ist. dan sie haben noch keyn hunger tzu dyser speys / sein noch tzu vol / die mess wil vn muß eyn hungerige seel haben / die vorlangen hab nach vorgebung der sund / vnd gotlicher huld.

37

Do gby pui (ou) nicht  
fa

IV.

E liij



# Ihesus.

38

vorher wie pvan(n)ig  
95 Nr

Item. xxxviii. Die weil aber solch vortzagē vnd vnruhe des gewissens nit anders ist/dan eyn gebrechē des glaubens/die allerschwereste krankheyt/die der mensch mag haben an leyb vnd seele/vund sie nit auff eyn mal/oder eylendt mag gesund werden/ist es nutz vñ nodt dz der mēsch yhe vnruiger sein gewissen ist/yhe mer er tzum sacramēt gee/oder meß hore/so doch dz er gottes wort darinnen ym furbilde/vund seinen glaubē daran speyße vnd stercke/vñ yhe sich fursehe/dz er nit eyn werck oder opffer darauf mache/sonder laß sie bleyben eyn testamēt vnd sacrament/darauf er wolthat nemen vnd geniessen sol/vmbsonst vund auß gnaden/dardurch sein hertz gegen got suessz werde/vñ ein trostlich tzuorsicht gegē ym gewinne. Dan so singt der psalter psal. ciiij. Das brot sterckt dē mēschē sein hertz/vnd d wein macht frolich des mēschē hertz.

39

Chri

Item. xxxix. Es habē etlich gefragt ob man den stümen auch sol dz sacramēt reichen. Etlich meynen sie freuntlich tzubetriegē/vnd achten man sol yn vns gesegnete hostien gebē. Der schimpff ist nit gut/wirt got auch nit gefallē/der sie so wol tzu Chriſtē macht hat als vns/vnd yn eben dz gepurt dz vns. Darüb so sie vnnunfftig sein/vund man auß gewissen tzeichen mercken kan/das sie auß rechter Chriſtlicher andacht begeren/wie ich oft gesehen habe/sol man dem heyligen geist sein werck lassen/vund ym nit vorsagē was er fordert. Es mag sein dz sie ynwendig hoher vorstandt vnd glauben habē dan wir/welchem nyman sol freuelich widerstrebē. Lesē wir doch von sant Cypriano dem heyligē martirer/dz er den kinden lief. gebē auch beyd gestalt tzu Carthago/do er Bischof war/wiewol nun das selb auß seinen vsachē ist abgange. Chriſtus lief die kinder tzu ym kumen/wolt nit leydē

NB.

NB.

# Ihesus.

Dz yn ymant weret/so hat er auch sein wolthat wider stümen/noch blinden/noch lamen vorsagt. warumb solt dan sein sacramēt nit auch denen werden/die sein hertzlich/vnnd Christlich begeren?

Zum.xl. So sehen wir wie Christus sein heylige kirchē mit gar wenigen gesetzen/vnd wercken beladen/vnd mit vilen zusagē zum glaubē erhabe:wie wol es nun leyder vmbkeret ist/vnd mit vilen/langē/schweren gesetzen/vnd wercken wir getriben werden frum tzu sein/wirt doch nichts darauf. Aber Christus ha: eyn leichte burde/gehet kurtz tzu /das vberschwenckliche frumkēyt da ist/vnnd alles inglauben vnnd trawen steet. Erfullet das Isaias.x. sagt. Eyn kurtze volkūmenheyt wirt eyne syndflus voller frumkēyt bringen/das ist der glaub/der eyn kurtz ding ist/gehoren kein gesetz noch werck dartzu. Ja er schneidet abe alle gesetz vnd werck/vnd erfullet alle gesetz vnnd werck/darumb so fleusset auß ym eytel gerechtigkeit. dan so volkūmen ist der glaub/dzer on alle andere muhe vnnd gesetz macht/alles was der mensch thut/vor got angemem/vnnd wol than. Wie ich dauon mer gesagt hab/im buchle von den guten wercken. Darüb last vns hatten vor sunden/aber vil mehr vor gesetzen vnd gutten wercken/vnd nur wol warnemē gotlicher zusagūg/vnd des glaubē/so werden die guttē werck sich wol finden. Das helfff vns got. Amen.

40

Bedruckt tzu Wittenburgk Melchior Lotther der iung/Nach Christi geburt tausent funffhundert/vnnd im tzwentzigsten iar.



*[Faint, illegible text, likely bleed-through from the reverse side of the page]*

*[Faint, illegible text, likely bleed-through from the reverse side of the page]*

[26 Bl. 203]



Jb 4787 a  
—

ULB Halle 3  
003 732 096



56



Inches  
Centimetres

Farbkarte #13

B.I.G.

Blue

Cyan

Green

Yellow

Red

Magenta

White

3/Color

Black

4.5.

227

Sermon vō dem  
en Testamēt .das  
von der heyligē  
Kesse Doct.  
Mar. L.  
Aug.

Wittenbergk.

1520.

